

# LA USC DI LADINS - VENERDI' 28 AGOSTO 2020

LURIERES PUBLICS

## Moniaria: n picol vèrech inant...

*L Comun general de Fascia ge à dat sù a l'architet Marco Giovanazzi da Trent la direzion tecnica di lurieres per la Ciasa de la Moniaria*



*L rendering del restaure de la Ciasa de la Moniaria.*

Dò egn se veit n auter picol vèrech en cont del projet de restaure de la Ciasa de la Moniaria a Sèn Jan. Ai 11 de aost se à binà l Consei de Procura del Comun general de Fascia che à deliberà de ge dèr sù l'encèria a l'architet Marco Giovanazzi con studie tecnich a Trent, i servijes tecnics per la direzion di lurieres, la mesures e la contabilità di lurieres per fèr fora la Ciasa de la Moniaria. La delibera del Consei de Procura va en दौरa anché, ai 28 de aost del 2020.

L'era un di ultimes vèresc che mencià per poder zacan tachèr ite i lurieres de restaure, dò 6 egn da canche l'era stat metù a la leta projet preliminar e i finanziamenc da la Region Trentin Sudtirol.

Per dèr fora l'encèria l Comun general l'ha metù fora sul sistem telematic Mercurio la garejèda telematica e l'ha envià a tor pèrt 6 profesionisc ence fascegn. L'architet Giovanazzi, che l'ha ence fat l projet esecutif del restaure, à vent la gara con n priesc de 58.980,79 euro più agravies fiscai e previdenzièi (donca en dut 74.834,82 euro), zifra che vegn cà dal rebas del 28,70% metù

dant dal profesionist su la soma de basa de la garejèda de 82.722,00 euro. L diretor di lurieres cognarà ge stèr dò ai lurieres, verifichèr che dut vae dò sia strèda, che vegne mantegnù i termin de consegna de l'opera e meter en consaputa l Comun general de coche i va inant e de eventuei mudaments.

Recordon che la firma che à vent la gara de apalt per i lurieres de restaure l'è la Tecnobase srl de Trent che à portà dant na oferta per na zifra de 1.257.026,61 euro con ite ence i oneres per la segurezza, fajan n rebas del 8,070% su la soma metuda a l'encant de 1.361.020,52 euro. La speisa en dut per l restaure de la Ciasa de la Moniaria é de 1.922.558,70 euro che vegn corida con 1.730.302,83 euro de contribuc de la Region Trentin Sudtirol e con 192.255,87 euro de fondi del Comun general de Fascia.

La Ciasa de la Moniaria per sie valor storich e cultural l'è n frabricat sot sconanza e i lurieres cogn vegnir porté dant con atenzion e tel respet de duc i vincoi. Ades se speta demò de veder zacan i ponc e che se tache ite coi lurieres.

MCI